



## **GOVERNUN KONSTITUSIONÁL VIII**

---

### **Rezolusaun Governu nian N. 15 /2021**

#### **Loron 15 fulan-marsu**

#### **Mantein impozisaun serka sanitária iha munisípiu Dili**

Konsidera katak, liuhusi Rezolusaun Governu nian n. 12/2021, loran 8 fulan-marsu, ne'ebé publika filafali liuhusi Rezolusaun Governu nian n. 14/2021, loran 10 fulan-marsu, impoin ona serka sanitária iha munisípiu Dili;

Konsidera ba aumentu significativu husi número diagnóstiku COVID-19 nian iha munisípiu Dili;

Konsidera katak evolusaun husi número diagnóstiku COVID-19 nian iha munisípiu Dili maihusi situasaun tranzmisaun lokál SARS-CoV-2 nian;

Konsidera katak, tanba verifikasaun tranzmisaun lokál SARS-CoV-2 nian iha munisípiu Dili sa'e maka'as, iha nesesidade atu tau atensaun ba risku ne'ebé sa'e maka'as katak COVID-19 bele nakda'et ba munisípiu sira seluk no/ka ba Rejiaun Administrasaun Espesiál Oekusi Ambenu;

Konsidera katak interruptsaun ka kondisionamentu ne'ebé rigorozu tebes ba sirkulasaun ema no sasán nian entre sirkunskrisaun administrativa sira iha territóriu nasional hamenus oportunidade tranzmisaun SARS-CoV2 nian ba populasaun sira ne'ebé hela iha munisípiu seluk iha territóriu nasional no, tanba ne'e, hamenus mós oportunidade atu surtu foun COVID-19 nian mosu tan iha fatin oin-oin iha territóriu nasional;

Konsidera katak, tanba situasaun kalamidade pública, ne'ebé provoka husi pandemia COVID-19, Dekretu Prezidente Repúblika nian n. 15/2021, loran 1 fulan-marsu, deklarara ona estadu emerjénsia atu vigora husi tuku 00:00 loran 4 fulan-marsu to'o tuku 23:59 loran 2 fulan-abril tinan 2021.

Konsidera katak alínea b) husi artigu da-4 Dekretu Prezidente Repúblika nian n. 15/2021, loran 1 fulan-marsu, determina ona katak iha suspensaun parsiál ba liberdade sirkulasaun no liberdade atu hela iha fatin ne'ebé de'it iha territóriu nasional, tanba ne'e autoridade pública sira ne'ebé iha kompeténsia bele impoin restrisaun sira ne'ebé prezisa atu hamenus risku kontájju nian no atu ezekuta medida sira prevensaun no luta hasoru epidemia ne'e nian, inklui distansiamentu sosiál, kuarentena ba ema ne'ebé deskonfia hetan ona infesaun, izolamentu ba ema moras sira ka ema ne'ebé deskonfia hetan ona moras, obriga ema atu hela iha uma de'it no impozisaun serka sanitária nian sira;

Konsidera katak alínea o) husi n. 1 artigu da-115 Konstituisaun Repúblika nian fó kompeténsia ba Governu atu pratika atu saida de'it no foti medida prevensaun nian sira ne'ebé nesésaria ba dezvoltamentu ekonómiku-sosiál no ba satisfasaun nesésidade comunidade timoroan sira nian.

Governu hasai rezolusaun, bazeia ba alínea o) husi n.1 husi artigu da-115 Konstituisaun Repúblika nian no ba alínea b) husi artigu da-4 Dekretu Prezidente Repúblika nian n. 15/2021, lora 1 fulan-marsu, hanesan tuirmai ne'e:

1. Mantein impozisaun serka sanitária nian ida iha munisípiu Dili, no kontinua taka postu fronteira sira ne'ebé instala iha área munisípiu ida-ne'e nian, no bandu ema atu halo sirkulasaun entre munisípiu ida-ne'e no sirkunskrisaun administrativa sira seluk, sein prejuízu ba exesaun sira ne'ebé prevee iha número tuirmai ne'e;
2. Primeiru-Ministru bele autoriza, nu'udar exesaun, ema hodi halo sirkulasaun entre munisípiu Dili no sirkunskrisaun administrativa sira seluk iha kazu sira ne'ebé iha fundamentu forte ho razaun seguransa pública, saúde pública, assistência umanitária, manutensaun ba sistema abastecimentu público ka realizasaun interesse público;
3. Primeiru-Ministru bele delega, ho possibilidade atu halo subdelegasaun, ba Diretor Sentru Integradu Jestaun Krize nian, kompeténsia ne'ebé prevee iha número anteriór.
4. Pedidu sirkulasaun nian entre munisípiu Dili no sirkunskrisaun administrativa sira seluk, interesadu sira mak haruka ba Diretor Sentru Integradu Jestaun Krize nian, di'ak liu haruka liuhusi enderesu korreiu eletróniku (e-mail) [centrointegradogestaodecrises@gmail.com](mailto:centrointegradogestaodecrises@gmail.com), maibé ida-ne'e la taka dalan atu interesadu sira bele entrega diretamente pedidu ne'e iha instalasaun Sentru Konvensoins Dili;
5. Autorizasaun ba sirkulasaun entre munisípiu Dili no sirkunskrisaun administrativa sira seluk ne'ebé atu konsede, nu'udar exesaun, sei fó, uza formatu eskritu, iha ne'ebé identifika ema ne'ebé hetan autorizasaun atu sai husi ka tama iha área munisípiu Dili nian, ho identifikaun xapa matrícula husi veíkulu ne'ebé sei uza hodi halo dezlokasaun, lora no motivu dezlokasaun nian no informaun kona-ba maihusi ne'ebé no atu ba ne'ebé;
6. Ema sira ne'ebé, nu'udar exesaun, hetan autorizasaun atu tama ba ka sai husi munisípiu Dili, hanesan mós sasán esensial no la esensial sira tenke tranzita liuhusi sentru kontrolu integradu nian ida husi hirak tuirmai ne'e:
  - a) Sentru Kontrolu Integradu Leste nian, ne'ebé atu estabelese entre Manatutu no Metinaru;
  - b) Sentru Kontrolu Integradu Sentru nian, ne'ebé atu estabelese iha Laulara;
  - c) Sentru Kontrolu Integradu Oeste nian, ne'ebé atu estabelese entre Tibar no Tasitolu;
  - d) Sentru Kontrolu Integradu Marítimu, ne'ebé atu estabelese iha Portu Dili, ba entrada no saída husi munisípiu Dili ne'ebé uza transporte tasi nian;
  - e) Sentru Kontrolu Integradu Aéreo, ne'ebé atu estabelese iha Aeroportu Internasionál Nicolau Lobato, ba entrada no saída husi munisípiu Dili, ne'ebé uza transporte aéreo.

7. Sentru Kontrolu Integradu sira ne'ebé temi iha número anteriór:
  - a) Funsiona iha loron-segunda, loron-kuarta no loron-sesta, husi tuku 06:00 dadeer to'o tuku 16:00;
  - b) **Ninia** funsionamentu sei asegura husi ekipa sira ne'ebé komposta husi funsionáriu, ajente ka traballadór administrasaun públika nian ne'ebé nomeia husi Ministru Interiór, Ministra Saúde, Ministru Administrasaun Estatál no Ministru Agrikultura no Peskas, ne'ebé sei informa ba Diretór Sentru Integradu Jestaun Krize kona-ba sira-nia identidade no kontaktu sira;
  - c) Koordena husi Komandante Operasionál Sala Situasaun Sentru Integradu Jestaun Krize nian, ne'ebé bele delega kompeténsia ne'e ba Komandante Operasionál da-2.
8. Aleinde kumpre regra sira ne'ebé hatuur ona iha número 6 no 7, sirkulasaun sasán entre munisípiu Díli no sirkunskrisaun administrativa sira seluk, liuhusi rai-maran, tenke halo tuir mós regra sira tuirmai ne'e:
  - a) Kondutór no tripulasaun veíkulu nian sira seluk ne'ebé tula sasán lori ba munisípiu Díli, no ne'ebé mai husi sirkunskrisaun administrativa sira seluk, sei para de'it iha sentru kontrolu integradu sira, no husi ne'ebá, kondutór ka tripulasaun seluk maka sei tula fali sasán hirak ne'e tama ba munisípiu Díli laran;
  - b) Kondutór no tripulasaun veíkulu nian sira seluk ne'ebé tula sasán ba sirkunskrisaun administrativa sira seluk, no ne'ebé maihusi munisípiu Díli, sei para de'it iha sentru kontrolu integradu, no husi ne'ebá, kondutór ka tripulasaun seluk maka sei tula fali sasán hirak ne'e ba fatin sira fora husi munisípiu Díli;
  - c) Molok troka kondutór no tripulasaun sira, ne'ebé alínea anteriór sira ne'e temi ona, ekipa sentru kontrolu integradu sei dezinfeta parte ne'ebé maka kondutór no ajudante sira hela baibain iha laran husi kabine veíkulu terrestre nian ne'ebé tula sasán, tuir norma sira ne'ebé sei hetan aprovasaun husi diploma ministeriál Ministra Saúde nian.
9. Bainhira sirkulasaun sasán nian uza transporte marítimu ka aéreu, tripulasaun transporte sira-ne'e nian labele tuun husi ró ka aviaun laran, ka bainhira sira tenke tuun duni, sira labele sai husi zona internasionál portu ka aeroportu nian, sira tenke uza nafatin máskara takaibun no inus nian no mantein distánsia, pelumenu, metru ida husi ema seluk sesé de'it;
10. Bainhira de'it karik bele, sasán ne'ebé la aat lalais, no ne'ebé sirkula entre Díli no sirkunskrisaun administrativa sira seluk, ka sasán hirak ne'ebé mai husi rai-li'ur, kumpre períodu armazenamentu nian ida iha fatin ne'ebé halo tuir regra ijienizasaun nian ne'ebé sei aprova husi diploma ministeriál Ministra Saúde nian, molok distribui liuhusi komérsiu retallu nian;

11. Revoga ona Rezolusaun Governu nian n. 12/2021, lora 8 fulan-marsu, ne'ebé publika filafali husi Rezolusaun Governu nian n. 14/2021, lora 11 fulan-marsu;
12. Rezolusaun Governu nian ida-ne'e sei kaduka iha tuku 23:59 lora 2 fulan-abril tinan 2021;
13. Rezolusaun Governu nian ida-ne'e tama iha vigor iha lora tuirmai husi ninia lora publikasaun nian.

Aprova iha Konsellu Ministrus, iha lora 15 fulan-marsu tinan 2021.

Publika keda.

Primeiru-Ministru,

---

Taur Matan Ruak